

清·光緒三十一年點石齋刊本影印

約章成案匯覽

(七)

北洋洋務局纂輯

華文書局股份有限公司印行

約章成案匯覽乙篇卷十六目錄

成案

通商門 加稅類

大理寺少卿盛等籌議加稅辦法摺 光緒二十六年
附清單

戶部等會議加稅事宜摺 光緒二十六年

戶部等會議加稅事宜片 光緒二十六年

總署咨哆囉呢加稅日後復出口應照算分別發給免照存票

文 同治十二年

外務部咨莫非鴉合同在新約未定以前准於六箇月內值百

抽五文 光緒二十八年

然聖明之治天下

約章成案匯覽乙篇卷十六

成案

通商門 加稅類

大理寺少卿盛等籌議加稅辦法摺

光緒二十六年
附清單

奏為遵

旨籌議增稅事宜並酌擬稅釐兼顧辦法恭摺密陳仰祈

聖鑒事竊臣等於光緒二十五年十月十六日承准軍機大臣片

交本日面奉

諭旨盛宣懷奏陳條陳籌餉事宜開單呈覽一摺據稱加稅一事
與各國屢議未成查咸豐十年新定通商稅則善後條約第一

欵載明應核作時價照值百抽五例征稅現在金貴銀賤但須
扼定此一語將各口進出貨物稅則照時價另行核估自無所
用其加稅現屆十年換約限期應及時迅與認真開議又近來
外國菸酒藥料器皿等物中國銷路甚廣不盡各國官商自用
應如何分別辦理之處請一併籌議等語各口關稅如照現在
時價核估所增稅項實為籌餉大宗著派盛宣懷聶緝縈會同
赫德查照條約迅速籌辦仍由總理各國事務衙門綜核辦理
欽此仰見

聖明在上俯采芻蕘伏讀之餘莫名欽感臣等當即先與赫德疊
次會商旋經赫德呈遞估價比較清冊並據聲稱洋稅二千

數百萬內有洋藥一項已經加稅船鈔一項無從另估又進出口貨冊內新增名目已照現時估價亦難再增出口貨皆係銀本絲稅則法國不願加增茶稅本屬太重必須議減方能暢銷止有原列稅則內金價所置之進口貨可照時價另行核估洋貨土貨絮長補短每年通扯增收之數必有加增其所增多寡以銷路為衡殊難預定實數等語臣等竊以為稅則十年一修尚須無事之秋方能照約籌議實屬機不可失現與赫德詳細妥籌必須稅釐兼顧乃為有利無弊擬請照前奏先將進出口貨一面照時價核估持平修改一面專指洋貨援照洋藥稅釐並征辦法於核估時價正稅值百抽

五之後並連子口半稅二五統加釐金一倍共總值百抽十五俱在海關並征則於籌餉大有裨益伏查洋藥稅釐並征一案前出使大臣曾紀澤在英國往復籌商時閱數年始有成議開辦後洋藥進口漸減漏卮漸窄而海關並征釐金每歲得以加增五百萬上下中飽偷漏之弊一掃而空俱歸實際此實中國通商以來最為利益之事故臣等此次擬將進口洋貨援照辦理在洋藥不過進口貨之一端關涉亦僅在一國當時籌辦已如此之難茲則所議不止一項並須與各國次第商量近來辦理交涉尤與從前情勢不同能否尅期就範尚無把握現值

國家需款孔亟但有可以設法之處自應盡力籌維曾問洋商
詳加討論其意總以各處釐金留難紛雜於彼貨銷場有礙
若能將釐金定以確數與關稅一起並征較為畫一簡便冀
貨可暢銷則雖多出稅銀可免需索拖延之累彼或尚可允
從現議稅釐並征係專指進口洋貨而言其土貨釐捐一切
照舊並擬將出口土貨向完半稅者改完釐金以抵洋貨釐
捐改歸海關並征之數是於各省釐金實無所損所有現擬
辦理情形分別開呈清單二件恭呈

御覽其中所擬辦法皆與赫德逐細攷究據稱即可持此開議此
後詳細條目仍隨時與總理各國事務衙門妥籌辦理理合

繕摺密陳是否有當伏祈

皇太后

皇上聖鑒訓示謹

奏

謹將加稅辦法繕具清單恭呈

御覽

一洋貨進口稅赫德已將進口貨物詳細查明按照現今估價立一比較清冊其中凡徵數在值百抽五以下者均應增足在值百抽五以上者亦應核減並將原定稅則不列之貨物均一體估價補入

謹按現在估價清冊擬議一律值百抽十五援照洋藥辦法
作為稅釐併徵向章洋貨進口每值百兩完納正稅五兩又
運入內地完納子口半稅二兩五錢沿途釐金本已在內今
議另加七兩五錢以專抵落地釐捐每值百兩加倍併徵十
五兩統在進口新關一起完納運入內地行銷概不重徵
查己亥年進口稅六百七十五萬赫德節略內稱試將前呈
貨物比較清單揀閱大約懸揣可增進口稅在三百萬以內
又稱若能值百抽十五則進口併徵稅釐之總數必較從前
多收鉅款一倍

一土貨出口稅赫德已將出口貨物詳細查明按照現今估

價立一比較清冊其中凡徵數在值百抽五以下者應否加增在值百抽五以上者應否核減此二層即應預為酌奪並將原定稅則不列之貨物均一體估價補入

謹案現在估價清冊擬議值百抽五少則酌增多則酌減仍照向章出洋之土貨只納正稅五兩又半稅二兩五錢總共值百抽七五毋庸加收以顧華民生計向來洋商赴內地辦土貨領三聯單者完半稅不完釐無單者完釐不完半稅現擬給單赴內地悉令照半稅銀數全完釐金但准其赴出口海關呈驗已完釐捐之收據如比較半稅多完應由海關照數退還洋商並按結向釐局撥還海關無單者不得退還以

杜行銷中國內地之貨有所影射

查出口貨以絲茶為大宗絲稅約已值百抽五未便議加茶稅均在值百抽五之上應一律估價減至值百抽五雜貨可增之稅恐不敷此大宗查印度日本茶並無內地出口稅故銷路日盛華商因是虧累不堪若不減稅則茶必少銷稅亦日短若減稅則茶必多銷稅亦日增如能併徵辦成目前所短之茶稅自有所加之洋貨稅抵補況數年內茶多出口可望仍復減徵之數如減稅而無益於銷路屆時仍欲議加或可在出產內地隨便加捐無礙稅則

一土貨內地釐捐各省土貨稅釐一概照舊徵收與修改稅

則新章不相干涉

謹按各省土貨未售與洋商之前本有出產內地捐自可仍舊徵收但不可多加於向來所收之數譬如茶葉方議減稅則內地捐暫不必更改須看後銷路若何再行酌定其土貨售與洋商之後現擬新章領單由內地運貨至海口仍可照常完釐但逢關納稅過卡抽釐誠恐洋商不允或令於土貨起運第一釐局照應完半稅銀數一起完釐給予釐局印收所過關卡驗票放行洋商似無所藉口至於自此省運往彼省自行銷售之土貨仍一概照常沿途完釐惟洋貨既辦稅釐併徵各省釐捐擬請名為土貨釐捐局以分界限

一外國菸酒器皿等物如何分別辦理赫德節略內稱是欲將免稅之物改為徵稅之物亦應於修改稅則時籌商方能照辦

謹按己巳年擬辦修約第九款云英商家用船用雜物從前條約本有載明完稅各件今再將該前項雜物由總稅務司分別開明附後以免牽混若運入內地售賣仍照舊章完納稅銀等語似可照此籌議或謂此項約略懸揣亦可得稅銀一百萬之譜

謹將加稅備問各節繕具清單恭呈

御覽

或曰加稅誠有益於中國恐非各國所願前兩次與各國議而未成今時局更難豈有把握答曰加稅原非各國所願但期滿修改稅則係條約所載前議因專主鎊價故沙侯以金鎊並無定價駁復今照時值估價應增者增應減者減似有可允之理至稅釐併征之法向問洋商皆極稱釐捐留難不便若趁此各國無事修改稅則並議定併征據赫德云洋商樂於直捷或允加重稅項

或曰洋貨加稅太重恐洋貨滯銷則稅亦有礙答曰華民已用慣洋貨購買均屬有力之家當不靳此現議土貨估價而不加稅即如茶葉尚擬減稅則土貨必可暢銷洋商既獲運銷

我土貨之利必將所辦土貨資本購買洋貨至中國以省匯兌金銀之費斷不患滯銷於稅有礙

或曰釐金行之已久雖積弊難除近有議包辦釐捐者當可加增釐金豈不勝於加稅答曰包釐之法若不權歸紳商則辦不動若予以事權則同一擾累且恐廣東之外他省辦不動從前洋藥包捐其弊百出逮至稅釐併征所收之款數倍於包捐中飽之弊一空公家歲益數百萬此其明證

或曰關稅之權盡歸洋人一旦有事恐關稅盡為洋人攫去不及釐金之權皆在華官答曰稅務司雖有估值驗貨之權而各關監督皆有銀號無論華洋商稅皆持關單自向銀號

完納即歸海關監督收用故收銀用銀之權仍在監督而不
在稅務司

或曰海疆有事恐關稅難收不如釐金與海疆不相干礙答
曰庚申甲申甲午海口有事各國進口出口貨物照常納稅
且交戰之國亦仍有他國代理未聞不收關稅若至封口以
致無稅可收其時亦斷無進出之釐金矣

或曰洋貨釐金一經併征雖戶部總收之數大有所增而各
省百貨釐金之內少去洋貨一宗收數不無減少疆吏以下
能不羣起阻撓乎答曰當此籌餉艱難之際能增進款百十
萬已覺其難況增常年進款數百萬以上誠強弱緊要關鍵